

LAKENBEREIDERS VAN WEERT

In den jaere XIIIIC zesse ende tseventich opten zessentwintichsten dach van Novembris in presencien van den scepenen ondergescreven, quamen Jan Maes Janszoen, vleeschouwer ter eenre zyden, ende Rutgher Daniels mitsgaders Jacobe Brouwers als gezworen werckmeesteren tot deser tijt tot Weert in den lande van Hoerne van den wullenwerke aldair zoe voir hen selven zoe voere den anderen ghemeynen ghewantmakers van Weert voirs. ter andere.

Bekenden en verlyden onderlinge als partiden aen beyden zijden, te wetene de voirs. Jan, dat hij verhuert heeit de voirs. ghemeynen ghewantmakers, ende de voirn. Rutgher ende Jacob, dat zij voir hen selven ende in den namen als voire teghens den selven Janne gehuert hebben wel ende wettelic een huys ofte een halle gestaen tot Berghen in de Hoochstraet tusschen heer Willems Braens, choirdekens huys an de zuytzijde ende sherenstraat an de noortzijde tot achter toe an den lesten balck ende nyet voirder, een termijn van acht jaeren lanck geduerende, dairaf dierste jair inne ghinck tsente Mertens daghe lestleden, omme elcx jairs den voirs. ghemeynen ghewantmakers van Weert dairaf te betalene den voirs. Janne Maes een en twintich rijnsch guldene tot vijff scellingen groten brab. tstuc gerekent, verschijnende den voirs. termijn elcx jairs, deen helft in de coudemerct, ende de andere helft in de paeschmerct van Bergen, dairaf den yerste termijn van betalingen zijn sal, nu dese tegenwordige Coudemerct.

Des is hier inne merkelic ondersproken, dat de voirs. Jan de voirn. hallen houden sal slootvaste van doeren ende veynsteren ende anders in goider loiflicker reparacien sonder der voirs. ghewantmakers coste ende alsoe dat de voirs. ghesellen dairby gheen schade en lyden. Oic is voirwarde, dat de voirs. gewantmakers

van Weert buyten de twee jairmerkten van Bergen in de voirn. hallen gheen ghesach en sullen hebben, ten waire oft hen int eynde van eenigher merct yet van hueren lakenen overschote, dat dat in der voirs. hallen sal bliven staende, tot der tijt toe, het zije vijff oft zesse weken min oft meer, dat zij dat gevoechlic wech sullen mogen halen. Ende desgelijcx, zoe wanneer de selve gewantmakers huer mercten gedaen sullen hebben, al wairen oic huerer twee oft drie, die nyet al ute vercocht en hadden, soe sal nochtan de voirs. Jan sijn huys ofte halle voirs. moigen aenveerden ende doen bewonen, sonder denghenen die nyet al vercocht en hebben. eenich ongerieff te doene; is oic mede bevoirwaert, dat de voirs. somme sullen moeten jairlicx betalen weder zy ter mercten comen oft nyet, om wellic betalinge alsoe te doene, hebben de voirs. Rutgher ende Jacob voir hen selven ende in de name als voren verbonden ende te pande geset hen selven ende alle huere goeden, ruerende ende onruerende, tegenwoirdige ende toecomende. Aldus ghedaen in presencien van Cornelise Peck ende Jacoba Huysmanssone, scepenen van Bergen. R. A. 's Hert., B. o. Z., R. 291:138.

De eigenaar overleed in 1484. Bij de deeling der nalenschap, 25 Juni van dat jaar, viel het pand ten deel aan de weduwe, Barbara Jacobs. Zij woonde in De Drie Koningen, gelegen „dweers tegens” de hal. Met haar werd 22 April 1485 een nieuwe huur-overeenkomst gesloten.

De Hal van Weert heet later (o. a. 1558) de Roode Lelie, doch behoudt in den volksmond haar ouden naam (nog in 1638).

Het gebouw wordt in 1587 ingericht tot stalling voor de compagnie ruitery van d' Haultain. In 1610, als de stad Weert het huis verkoopt aan Bergen op Zoom, werd het gebruikt als ammunitie-magazijn.